



**Komunikadu Imprensa  
Semináriu Rejionál Suai  
23 Novembru 2021**

**JSMP hala'o semináriu rejionál ba iha membru konsellu suku sira no comunidade  
sira iha Munisípiu Covalima**

Iha 18 Novembru 2021, JSMP realiza semináriu rejionál kona-ba demokrasia, knaar órgaun soberanu, partisipasaun públiku iha prosesu halo lei no asesu ba justisa formal. Semináriu ne'e hala'o iha Munisípiu Covalima.

Semináriu ne'e ho objetivu atu fasilita oinsa públiku, liuliu xefe suku, membru konsellu suku no membru comunidade sira ne'ebé antes ne'e JSMP fó ona treinamentu ba no mós participante sira ne'ebé foin marka prezensa iha semináriu ne'e, bele rona diretamente no hato'o sira ninia hanoin, kítika ka komentáriu no preokupasaun sira ba parlamentu nasionál, nu'udar representante povu nian no órgaun judisiáriu sira hanesan prokuradór no defensoria públiku.

"Atividade divulgasaun informasaun ba públiku ne'e importante tebes ba membru konsellu suku sira, ida-ne'e bele ajuda hasa'e no hakle'an liután sira-nia koñesimentu kona-ba papél autór judisiáriu sira-nian no oinsá lori sira-nia kazu ba hetan justisa iha tribunál, tanba sira hetan oportunidade hasoru malu diretamente ho autoridade judisiáriu sira," dehan Sra. Ana Paula Marçal, Diretora Ezekutiva JSMP.

Oradór ba semináriu ne'e husi Xefe Prokuradoria Distritál Suai, Dr José Elo esplika kona-ba knaar ministériu públiku iha fornese assisténsia legál ba ema kbiit laek sira tuir konstituisaun no lei sira, susesu, progresu no dezafiu, defensoria públiku representa husi, Dr. Domingos dos Santos koalí'a kona-ba knaar defensoria públika bainhira fornese assisténsia legál ba ema kbiit laek sira tuir konstituisaun no lei sira, susesu,

progresu no dezafiu no diretora JSMP, Sra. Ana Paula Marçal, apresenta kona-ba progresu no dezafiu iha parlamentu nasional no mós tribunál.

Kestaun ne'ebé partisipante sira foti iha sesaun semináriu ne'e kona-ba eransa ne'ebé feen laen hetan, divórsiu, problema fahe subsídiu husi governu, atuasaun membru polisia sira ba iha comunidade, kazu rai no ninia prosesu ne'ebé han tempu naruk, responsabilidade kriminál no lei sira ne'ebé ladun fó vantajen ba comunidade.

Relasiona ho kestaun sira ne'ebé partisipante sira foti, Prokuradór Dr. José Elo esplika katak kona-ba eransa ou sasan ne'ebé feen la'en hetan no bainhira la'en mate sasan ne'e sei entrega ba feen no bainhira feen mate sei entrega ba oan sira, depende ba inan-aman atu entrega ba se laiha ema ida mak bele kontra, mezmú parte ruma la simu no hatama prosesu to'o iha tribunál sei la manan.

Kona-ba kazu divórsiu, nia esplika katak iha prosesu divórsiu Estadu sei tau interese ba labarik aas liu buat hotu-hotu. Ne'e signifika katak ministériu públiku sei tau konsiderasaun ba labarik nia futuru, inklui fahe responsabilidade inan no aman hodi kontinua tau-matan no proteze labarik sira to'o boot intermus saúde, edukasaun, ben-estar no seluk-seluk tan. Ezemplu tribunál deside atu kada fulan aman tenke fó US\$20.00 ba iha ninia oan sira, se la kumpri alimentasaun ne'e, inan ka aman komete tan krime la halo tuir obrigasaun alimentár.

Responsabilidade kriminál, se ema ruma halo krime ema ne'e mak tenke responsável, ezemplu se bainhira oan ida halo krime no halai tiha, polisia mai lori inan aman ba iha polisia nia fatin laos atu ba hatan ba krime ne'ebé sira nia oan halo, maibé atu foti de'it identifikaun, signifika katak kuandu krime ida oan mak halo labele transmite fali ba nia aman no mós aman mak halo labele transmite fali ba oan.

Defensoria Públiku Distritál Suai, Dr. Domingos dos Santos, iha nia intervensaun hateten katak kazu rai ne'ebé husi 2008 to'o agora seidak iha rezultadu tanba defensor públiku sira iha dezafiu sira hanesan menus rekursu umanus no kazu sivíl ne'e kazu ne'ebé komplikadu no presija kompleta dokumentu sira hotu antes prosesu hahú no kazu sivíl ne'e iha kazu balu urjente no kazu balu la urjente. Kazu urjente iha kazu sivíl mak providénsia kautelár. Ezemplu ema ruma iha problema rai no konsidera katak na'in duni ba rai, bele hatama petisaun inisial kautelár atu hapara konstrusaun ka halo rahun kontrusaun iha rai disputa ne'e. Alende ne'e, tenke kolabora ho defensor atu prova katak rai ne'e se nian no tenke arola sasin baliza husi rai refere. Entretantu kona-ba kazu rai nian comunidade sente sira nia direitu violadu bele apresenta provas hodi bele prosesu.

Semináriu Rejionál ne'e abertura husi Administradór Munisípiu Suai, Sr. Francisco de Andrade, ne'ebé espresa ninia sentidu apresiasaun kle'an ba atividade ne'e no agradese ba JSMP tanba bele realiza semináriu ne'e ba comunidade sira. Nia mós husu atu partisipante sira bele rona ho di'ak informasaun sira ne'ebé fó husi oradór sira liuliu kona-ba saida mak direitu no demokrasia no oinsa atu prosesu kazu sira tuir prosesu justisa formal no husu ba partisipante sira ne'ebé tuir semináriu atu aproveita tempu ho di'ak tanba xefe suku ho xefe aldeia mak ukun povu iha baze no mós habelar tan informasaun ne'ebé hetan iha semináriu ne'e ba comunidade sira ne'ebé la partisipa iha semináriu ne'e.

Alende halo abertura ba semináriu ne'e administrador ne'e mós fahe informasaun kona-ba knaar parlamentu nasionál nian mak hanesan aprova no halo lei, fiskalizaun no foti desizaun polítika iha prosesu halo lei.

Partisipante sira iha semináriu ne'e mai husi xéfe suku sira, delegadu fetu, konsellu suku ne'ebé kompostu hosi representante Suku Zulo, Suku Raemea, husi Postu Administrativu Zumalai, Munisípiu Covalima, Suku Camanasa, Suku Labarai, Suku Matai, Suku Suai Loro Postu Administrativu Suai Vila, Munisípiu Covalima.

Semináriu ne'e, ensera husi Diretora Ezekutiva JSMP, Sra. Ana Paula Marçal, iha ninia intervensaun agradese ba oradór sira no mós partisipante sira hotu ne'ebé partisipa iha semináriu ne'e no espera katak partisipante sira iha ona informasaun naton kona-ba matéria sira ne'ebé apresenta iha semináriu ne'e.

Semináriu rejionál ne'e realiza husi JSMP ho parseiru suporta CEPAD no hetan fundus husi União Europeia.

Atu hetan informasaun kompleitu, favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)